



Inatsisartunut ilaasortaq
Anna Wangenheim
Demokraatit

06-01-2022
Suliap normua 2021 - 8786
Akt. id. 18929625

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

Meeqqat pisinnaatitaaffii pillugit Naalagaaffiit Peqatigiit isumaqatigiissutaannik malinninneq pillugu § 37 naapertorlugu apeqqummut nr. 5/2022-imut akissut

Asasara Anna Wangenheim

Apeqqutinut qjanaq. Apeqqutit ataani uteqqinneqarput akissummillu malitseqartinneqarlutik.

1. Naalakkersuisut Nuna tamakkerlugu periusissiaq Naalagaaffiit Peqatigiit meeqqat pillugit isumaqatigiissutaat malinneqarnissaanik qaqugumita tamanut nalunaaruteqarniarpat, soorlu Inatsisartut UPA 2020-mi (imm.35) Naalakkersuisunut peqqusisimasut?

Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaa pillugu iliuusissanut pilersaarummik suliaqarneq annertooujussuuvoq, tassami meeqqap illersorneqarnissaanut pisinnaatitaaffinnik assigiinngitsorpasuumik isumaqatigiissut imaqarpoq. Suliaq aallartinneqareerpoq aamma Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaa pillugu nunamut tamarmut iliuusissanut pilersaarut Inatsisartut 2022-imi ukiakkut ataatsimiinnissaanni Naalakkersuisut saqqummiutissallugu pilersaarutigaat.

2. Naalakkersuisut periusissiaq aallaavigalugu Inatsimmi allannguiniarnerlutik ilisimatitserersinnaanerlutik?

Isumaqatigiissummi pisinnaatitaaffinnut assigiinngitsunut naleqqiullugu, iliuusissanut pilersaarummi imarineqartussat inatsisinik qanoq annertutigisumik allanngortitsisinissamik pisariaqartitsissutaassanersut massakkuugallartoq sulii paasinarsingilaq.

3. Naalakkersuisut aningaasanut missingiummik takutitserersinnaanerlutik periusissiaq piviusunngussagaluarpat qanoq naleqarnissaanik?

2015-imi Inatsisartut ukiakkut ataatsimiinneranni Naalagaaffiit Peqatigiit meeqqat pillugit isumaqatigiissutaata ilanngunneqarnissaa pillugu kingusinnerpaamik 2016-imi ukiakkut ataatsimiinnermi Inatsisartut inatsisissaattut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut (UKA2015/33) saqqummiunneqarpoq.

Suliarineqarnerata nalaani taamaattoq, inatsilerinikkut naliliinerit aallaavigalugit, Meeqqat pisinnaatitaaffii pillugit Naalagaaffiit Peqatigiit Isumaqatigiissutaata tamakkiisumik atortuulersinneqarsinnaanera periarfissaanngitsoq erseqqissivoq, tassami suliaqarfiit meeqqat pisinnaatitaaffii pillugit isumaqatigiissummut ilaatinneqartut tamakkerlugit tiguneqarsimangimmata. Tamanna tunngavigalugu



ataani allanneqartoq allannguutissatut siunnersuut Ilaqutariinnermut- Peqqissutsimullu Ataatsimiititaliap saqqummiuppaa taannalu Inatsisartunit tamarmiusunit akuersissutigineqarpoq.

"Namminersornermut inatsimmut killissarititap iluani Naalagaaffiit Peqatigiit Meeqqat pillugit isumaqatigiissutaata kingusinnerpaamik 2017-imi Inatsisartut inatsisaannut ilanngunneqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut."

Taassuma malitsigisaanik, Ilaqutariinnut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoq Aningaasaqarnermut Aatsitassanullu Naalakkersuisoq peqatigalugu, aalajangiiffigisassatut siunnersuutip aningaasaqarnikkut allaffissornikkullu kingunissai pillugit peqqissaartumik misissueqqissaarnissaq aallartissagaat erninnaartumik aalajangerneqarpoq.

Misissueqqissaarnerit marluk suliarineqarput:

1. Aningaasaqarnikkut allaffissornikkullu kingunissat pillugit KORA-mit misissueqqissaarneq (Danmarkimi Social- og Indenrigsministereqarfiup ataani Det Nationale Institut for Kommuner og Regioner)
2. Meeqqat pisinnaatitaaffii pillugit Naalagaaffiit Peqatigiit isumaqatigiissutaata inatsisartut inatsisaattut ilanngunneqarnissaanut inatsisitigut ajornartorsiutaasinnaasut pillugit misissueqqissaarneq, taanna Professor Michael H Jensen, Aarhus Universitetimeersumit suliarineqarpoq.

Ilaatigut aningaasaqarnermut annertooujussuarmik kinguneqarsinnaanera misissueqqissarnernit inerniliussat takutippaat, matumani aningaasanut inatsimmut kingunissai kiisalu piginnaasanik pisariaqartitsinerulernerit ilanngullugit. Finnmarkimi Norgemiittumi meeqqat pisinnaatitaaffii pillugit isumaqatigiissumik naammassinninnermi pitsaassuseq, meeqqat pisinnaatitaaffii pillugit isumaqatigiissutit inatsisinngortinneqarnerani anguneqassappat, Kalaallit Nunaata ukiumut 300 mio.kr.-it missaat amigartoorutigisassagai missiliorneqarpoq.

Ataatsimut isigalugu aningaasartuutissanut pisariaqartinneqartut miliuuninik pingasunik kisitsititaqartunik aningaasartuutissat naatsorsorneqarput, aamma ullumikkut suliassaqaqfinni sulisunik piginnaasalinnik amigaateqarfiusuni, ingammik najukkani minnerusuni, ilisimaneqanngitsumik annertuumik sulisussanik pisariaqartitsisoqartussaasoq paasineqarluni.

2016-imi KORAp misissueqqissaarnerata tamanut saqqummiunneqarnerata kingorna, suliassaqaqfimmii ineriartortoqarpoq. Kisianni iliuusissanut pilersaarutip takkuttussap qanoq akeqarnissaa pillugu missingersuusiornissamut suliaq suli annertooujussuvoq. Iliuusissanut pilersaarutip takkuttussap piviusunngortinneqarnissaa qanoq akeqassanersoq massakkuugallartoq naatsorsorneqarsinnaanngilaq.

KORAp misissueqqissaarnerata imaqarniliorneqarnera uani linkimi takuuk:

<https://naalakkersuisut.gl/~media/Nanoq/Files/Publications/Familie/GL/KORA%20-%20Inkorporering%20af%20FNs%20b%3%b8rnekonvention%20i%20Gr%c3%b8nland%20kal.pdf>

Inussiarnersumik inuulluaqqusillunga


Paneeraq Olsen